

1 Timoteo

Pablumi punta kaq kartanta kaçhan Timoteuman

Timoteuqa musu kashanmanta-pachami apustul Pabluwan puriran Amitunchik Jesucristupa shumaq rimayninta yaçhachikur. Chaymantami Pabluqa Éfeso pwiblupi Timoteuta dijaran, kriyiq masinkunata yaçhachinanpaq. Chaynu imanuy paykunata yaçhachinanpaq nir yaçhananpaq, Pabluqa kay kartata payman kaçharan. Chaymi kananpis kay kartata liyir intrakanchikllapa imanumi Tayta Dyus munashannulla kawsanallapapaq nirmapis. Timoteuqaq masta intrakanarqa liyishun Hechos 16.1-3; 17.14-15; 18.5; 19.22; 20.4; Filipenses 2.19-22; 2 Timoteo 1.5; 3.15; Hebreos 13.23.

Pablumi saludakun

1 ¹⁻²Kusala munashay Timoteo, nuqa Pablo Amitunchik Jesucristupa apustulninmi kay kartata iskrishuni. Chaqa chaynu apustul kanaypaqqami washamaqninchik Tayta Dyus Wamran Jesucristuwan akramaran. Chaqa Wamranpimi kusalata kunfyakanchikllapa washamaqninchikllapa nir. Chaymi ashwan Jesucristupaq yaçhachikutiy kriyishaykirayku, qamqa chiqap wamray kanki. Chayraykumi Taytanchik Dyusta, chaynulla Amitunchik Jesucristutapis, mañakuni kusata llakipar tukuy imapi yanapashutin kusala shumaqta kawsanaykipaq nir.

Pablumi riman mana allinta yaçhachikuqkunapaq

³Kriyiq masiy Timoteo, unaymi nuqa Macedonia lugarman rinaypaqna karqa, Éfeso pwiblupi kidanaykipaq rugashutiy kidarayki. Chaynulla kananpis qashan

rugashuni chayllapi kidar, chay wakin runakuna mana allinta yaçhachikuqkunata nanaq nanaq willatki, amana chaynu yaçhachikananllapapaq. ⁴Chaynullami willankipis amana yanqalla mana sirbiq kwintukunata yaçhachikur, chaynulla chay unay rukunchikllapakunaqa ima ayllumantami karan nir yaçhachikur kawsanallapapaqqa. Chaqa chaynu yaçhachikuyashanllapaqa imanumi Taytanchik Dyusqa munamanchik nir intrakar, allita kriyinaqqaq mana yanapamanchikllapachu. Ashwanmi chayqa sirbin ukninchikwan ukninchikwan willanachimanallapalapaq.

⁵Chaynuqami nishuni yaçhachikunaykipaq allita Dyusninchikpi kriyir, mana ima mana allinta rurur imachu kusa allinla yarpunijun ima kar ukninchikllapa ukninchikllapa llakipanakurna kawsanallapapaq. ⁶Piru wakinkunaqami chaynu ukninllapa ukninllapa llakipanakur ima kawsanmantaqa limpu

pantar chiqanchakashallapa. Chaymi ashwan yanqalla mana sirbiq imakunapapna paynin paynin willanakur ima kawsanllapa. ⁷Chaqa paykunaqami Moisés mantakushankunapap kusata intrakaq, kusata yaĥar yaĥachikuq yupay tukunllapa. Chaynullami kusala chiqapta rimaq yupay tukunllapa, michka paykunalla chay rimayashanpap imatami niyani nir mana intrakaq karmapis.

⁸Allita yaĥashanchikllapanu Dyus nitin, Moisés mantakushankunaqami pay nishannulla allita kumplishaqa kusala allin. ⁹Chaymi allita yarpushunllapa: Mantakuykunaqa manami allinkunalata rurar kawsaqkunata kastigananpapchu. Ashwanmi tukuylla chay mana allinta ruraqkunata kastigananpap. Chaymi mayqanpis llallin mana allinta ruraqta, mana kasukuqkunata, uchakuqkunata, Dyusta mana kasuqkunata ima kastigananpap. Chaynullami kastiganpis taytanta, mamanta wanuchiqqunata, chaynulla tukuylla wanuchiqqunata ima. ¹⁰⁻¹¹Chaynullapis chay mantakuykunaqa kastigan chay masayjunkuna ukwan ukwan punuqqunata, mana masayjun kaqqunapis pakaplla punuqqunata, ullqupura punuqqunata, mayqanpis warmita, runata suwakur rantikuqqunata, llullakuqqunata, allinlatana rimananpap jurar qashan llullakuqqunata ima. Chaymi ashwan allita intrakashaqa, kusala shumaq Taytanchik Dyus, Jesucristupap yaĥachikunaypap nimashanmanta, ukman mana allinta yaĥachikuqqunata imami chay mantakuykunaqa kastiganqa.

Pablumi Jesucristuta payji nin yanapashanpap

¹²Chaymi kananqa Amitunchik Jesucristuta kusalata payji nini. Chaqa

payqami, nuqaqashi allita kriyini nir yaĥar kusalata jwirsayta qur ima yanapamasha imuraspis paylapapna yaĥachikunaypap. ¹³Piru allita yarpushunllapa, imanutaq Tayta Dyusqa kusala llakipakuq nir. Chaqa imanutaq nuqamaqa unayqa Jesucristupa kuntran kusala mana allinta rimar, paypi kriyiqkunata mana allinta runanaypap ikinpi purir kusalata jurapap ima kani. Chaqa chay tyimpuqami Jesucristupi mana kriyiq kashayrayku mana yaĥaraychu imatami rurayani nirmapis. ¹⁴Piru chaynu pantar ima kusala mana allinta rurasha katiympismi, Amitunchik Jesucristo kusala ukmanta llakipamaran. Chaynami chaynu llakipamarqa kusalata yanapamaran allita paylapina kriyir, paypap, chaynulla ukniykunapap llakir ima maydiyapis kawsanaypap.

¹⁵Chaymi allita intrakar kriyiyllapa. Chaqa kay nishuyanillapa chayqami chiqap, manami llulla imachu. Chaymi nishaykillapa: Jesucristumi kay pachaman shamuran uchanchikllaparayku tukuy tyimpu wanunallapapapna kayashanchikmanta tukuyta washamallapapap. Piru wakinkunamantaqami, nuqa kusala uchayjunqa karay Dyusnichikpa naypanpiqa. ¹⁶Nataq Taytanchik Dyusqami kusala ukman llakipakuq kar, mana qunqamar imachu llakipar washamasha. Chaynu llakipamashanwanqami allita intrachimanchikllapa imanutaq kusala uchayjun kashallapamapis llakipamanchikllapa nir. Chaymi ashwan tukuylla allita intrakar Jesucristulapina kriyir, pay munashannulana kawsashunllapa, paywan tukuy tyimpuqapna kawsanallapapap. ¹⁷Chayraykumi, Taytanchik Dyustaqa tukuy tyimpulana alabashunllapa: “Payqami kusala allin, kusala puytiq” nir. Chaqa payqami tukuy tyimpupap mantakun,

mana wanunlamapischu, chaynulla manami mayqanlapis paytaqa rikashalamapischu. Chaqa paylami Dyusninchikllapaqa. ¡Chaynumi kanqa!

¹⁸Kusala munashay wamray Timoteo, tukuy imata ruranaykipaq kanan willashuyani chaytaqami allita kriyishaykinulla, kusa allinlata yarpur ima karanlata ruranki. Chaqa Dyusninchikmi unaylla paypa kaqninkunata intrachitin qampaq kaynu niq: “Qamqashi Dyusninchiklata sirbiyanki kanqa” nir. Chaymi kananqa Amitunchik nishannu rurar shachinakurqami, kusala allin suldadunna kayanki kanqa. ¹⁹⁻²⁰Chaynu Dyusninchikpa kusa allinla suldadun kashaykiraykumi mana mayqanpis qampaqqa mana allinta rimanqallapamapischu. Chaqa wakinkunamaqami Dyusninchik nishanta mana kwintacharnachu, ashwan chiqanchakashallapa paymantaqa. Chaynullami chay ukninchikkuna Himeneuwan, Alejandrups tukushallapa. Chaymi paykunataqa kriyiqkunamanta chiqanchar, Satanaspakinpin dijasha kani, kusalata qischakar ima kwintata qukar, amana Dyusninchikpa kuntranta rimananllapaqna.

Dyusninchikmanqami kaynu mañakuypaq

2 ¹Piru kanan-shuyapaqami kusalata rugashaykillapa tukuy shunqunchikwan ima ministishanchikpaq, ukninchikkunapaq ima payji nir Tayta Dyusman tukuyapaq mañakunallapaq. ²Chaynullami mañakuyapaq gubyirunakunapaq, tukuylla chay karguyjun kaqkunapaq, shumaqta mantakunanllapaq. Chaynuqami nuqanchikkunapis kusala shumaqta Dyusninchikta kasur pay munashannulana ima kawsanallapaq, ama imapaq yarpupa-

kur imachu. ³Chaynu tukuyapaq Tayta Dyusman mañakushanchikqami kusala shumaq kar, aligriyachin washamaqninchik Tayta Dyustaqa. ⁴Payqami kusalata munayan tukuylla washakar, chiqap kaqpaq allita intrakananllapata. ⁵Chaqa, uklami kan Dyusninchikllapaqa. Chaynulla uklami kan Dyusninchikwan pullachamaqninchikllapa runapis. Paymi Amitunchik Jesucristo. ⁶Payllami tukuyllata washamanallapaqqa wanuranmapis. Chaynu wanutinmi Tayta Dyusqa allita intrachimaranchikllapa imanumi payqa kusalata munar tukuyllata washamanayanchikllapa nir. ⁷Chaymi nuqamataqa Tayta Dyusqa akrrar kaçhamaran Jesucristupa apustulnin kar, rir mana Israel runakunata yaçhachitiy kriyir chay chiqap kaqta riqsinanllapaq. Chaymi tukuy kay willashushayllapaq chiqap, manami llulla imachu.

⁸Chaymi kusalata munani amana mayqanpis imapaq paynin paynin willanakur, piñachinakur imanachu, ashwan maylawpipis kusala shumaq makinllapata unaqman alsar, Taytanchik Dyusman mañakunanllapata. ⁹Chaynullami munani warmikunapis allita tanyakar mudakunanllapata. Chaqa manami munanichu warmikunaqa kusalata lusinanpaq sunsunu mudakunanta, kusala ukmanta ñaqsakunanta, chaynulla kusala çhaniyjun urumanta, platamanta rurakashakunata, chaynulla kusala çhaniyjun raçhpata yakakunanllapamapatis. ¹⁰Ashwan chaynu kusalata mudakur ima lusinanmantaqa, Tayta Dyuspi kriyishanrayku kusala shumaqta ima kawsar wakinkunata rikachinman. Chaynuqami wakinkunapa naypanpiqa kusa llipyala mudakusha yupayna kayanqa. ¹¹Chaynullami Dyusninchikpaq mayqanpis yaçhachikutinqa,

warmikunaqa ama parlar imachu, uyarala ima uyakunmanllapa. ¹²Chaqa nuqapaqqami mana allinchu warmikuna runakunata yaĥhachinanpaq, chaynulla mantananpaqmapis. Chaymi ashwan ima katinpis uyarala kar uyakunmanllapa. ¹³Chaqa allita yaĥhashanchikllapanu Dyusqami puntataqa Adanta ruraran. Chaymantaraqmi Evataqa ruraran. ¹⁴Chaynulla chay dyabluqa manami Adantachu ingañaran. Ashwanmi warmita ingañatin, uchakuranmapis. ¹⁵Chayraykumi mayqan warmipis, Jesucristupi maydiyapis kriyirlla kawsar, ukkunata llakipar, allinlata rurar, tukuy imapi tanyakar kawsarmi washakanqallapa, kusalata qischakar wamrakunanpaq Tayta Dyus nisha katinmapis.

**Kriyiqkunapi karguyjunkunaqami
Dyuspi allita kriyiqkuna kanqa**

3 ¹Chiqaptami nishaykillapa: Mayqanpis kriyiqkunapa rikaqnin kayta munaqqami, kusala allinta rurayta yarpuyan. ²Chaymi chay kriyiqkunapa rikaqninkunaqa tukuywan kusala allin runa kanqa. Chaynu katinmi mana mayqanpis paypaqqa ima mana allintapis rimayanqallapachu. Chayraykumi payqa uk warmipa runanla, tukuy imata munananmantapis tanyakaq, imata rurananpaqpis uk kuti, manaqa ishkey kuti yarpuq kanqa. Chaynullami kanqapis ama sunsunulla puriq runa, mayqantapis wasinpi samachiq, listu yaĥhachikunanpaq ima. ³Amami maĥhaq, chaynulla maqanakunanpaq willanakuq imalamapischu kanqa. Ashwanmi kusala llakipakuq, ima katinpis mana das piñakuq ima kanqa. Piru amami qillayta ganananlapachu yarpunqa. ⁴Chaynullami tukuyula wasinpi kaq aylluntapis allita rikayta yaĥhanqa. Chaymi wamrankuna-

matapis yaĥhachinqa kusala kasukuq, rispitaquq ima kananpaq. ⁵Chaqa uk runa wasinpi kaq ayllunkunata mana shumaqta rikayta yaĥhaqqa, ¿imanunari Dyuspi kriyiqkunamataqa yaĥhachinqa shumaqta kawsananpaqqa? ⁶Chayraykumi kriyiqkunapa rikaqninqa, amami Dyuspi chayraq kriyiq runachu kanqa. Chaqa, imanupiq Dyuspi chayraq kriyiqta numratinllapamaqa ashwan kusana kani ima nir kusala mana allinpi mana rikarinman, imanutaq unaymaqa dyabluqa, Dyusninchikpa naypanpi kusana kayta munar uchakuran chaynu. ⁷Chaqa kriyiqkunapa rikaqnin runaqami, mana kriyiqkuna-paqpis kusala rispitaqasha kanqa. Chaynu karqami tukuyta naypanpimapis mana pinqaypaqtaqa tukunqanachu. Chaynulla manami imalapipis dyablu munashannuqa rurayanqalamanapischu.

**Imanumi kanqa kriyiqkunata
yanapar sirbiqkunaqa**

⁸Chaynullami chay kriyiqkunata yanapar sirbiqkunapis kaynu kanqa: Kusala rispitaqasha runa, ima nishantapis ruraq, mana maĥhaq imachu. Chaynulla amami kusalata qillayta imanullapis ganayta yarpuqchu kanqallapa. ⁹Ashwanmi, kusa allinla yarpuyinjun kashanrayku, Jesucristupi kriyirlla ima Taytanchik Dyus munashanlata ruraqkuna imana kanqa. ¹⁰Piru chaynu kriyiqkunata yanapar sirbinanpaq kaqkunataqami, puntataqa allita rikankillapa, allinchu sirbikunanpaq, manaqachu mana nir. Chaymanta chaynu rikatkillapa kusala allin katinqa chayraqmi akrankillapa sirbikuq kananpaqqa.

¹¹Chaynullami kriyiqkunata yanapar sirbiq warmi kaqkunapis, kusala rispitaqasha, mana ukpa washanta rimaq, tukuy imata munananmantapis

tantyaqaq, imatapis karanta ruraq ima kanqa.

¹²Piru chay kriyiqkunata yanapar sirbiqkunaqami uk warmipa runanla kanqa. Chaynulla wamrankunata, wasinpi tukuylla kaqkunatapis allita rikayta yačhaq ima. ¹³Chaqa kriyiqkunata yanapar sirbiqkuna kusa allinlata ruraraqami kusala rispitakasha imana kanqa. Chaynu karmi mana imapaq yarpur imamapischu kusala masta animakur ima parlakunqa Jesucristupi kriyishanpaqqa.

Kananqami chiqap kaqpaq allita intrakanchikna

¹⁴Kriyiq masiy, kay diyakunami watukushuyta yarpusha kani. Piru kay kartatami iskrishuni, ¹⁵imanupi tardar mana das chamutiyyqa, intrakanaykipaq imanumi Dyuspi kriyiqkunaqa shumaqta kawsanchikllapa nir. Chaqa tukuylla kriyiqkunaqami chiqap kawsaq Dyusninchikpa kaqninkuna kar, uk simintu allita shasha yupay paypaq chay chiqap kaqlata maydiyapis intrachikunapaqna kanchikllapa. ¹⁶Chaqa chiqaptaqami unayqa Tayta Dyus washamanallapapaq arnimashanchikllapataqa mana intrakaranchikllapachu. Piru kananqami kriyishanchikllaparayku rikasha yupayna allita intrakan-chikllapa.

Chaqa Jesucristumi kay pachaman shamur uk runa kwirpuyjunpaq tikrakan.

Wanuchitinllapapis Dyuspa Santu Ispiritun yanapatin qashan kawsamur intrachikuran, payqa kusala puytiq nir.

Tukuylla angelkunami imakunata ruratinpis rikanan.

Kriyiqkuna tukuy intirupi parlakutin, kusa achka runakuna paypi kriyiranllapa.

Chaynulla wanushanmanta kawsamurmi riran syiluman Taytanwanna kananpaq.

Mana allinta yačhachikuqkunami rikarimunqallapa

4 ¹Piru Dyuspa Santu Ispiritunmi allipla intrakaypaqta nimanchikllapa: Jwisyu diya chamunanpaq shipchana katingqashi, wakinkunaqa manana kwintachanqachu Jesucristupi kriyishantaqa. Chayshi ashwan chay dyablumanta kaq mana allin yačhakuykunatana yačhakuyta munanqallapa. ²Chaynulla chay kusallata yačhaq tukur llullakur yačhachikuq runakunatami kasunqallapa. Piru chay mana allinta yačhachikuq runakunaqami imuraslapis chaynullata yačhachikun mana pinqakur imamapischu. Chaqa chay runakunapa yarpuyningami kusala mana allinta rurananpaq čhupakusha yupay-ari. ³Chaynullami chay runakunaqa yačhachikunllapapis ama mayqanpis masayjun kananllapapaq. Chaynulla Tayta Dyus rurashan wakin mikuykunata ama mikunanllapapaq ima. Piru, nuqanchikuna allita kriyir chay chiqap kaqta riqsiqkunaqa, Tayta Dyusta payji nir imaqa tukuyta mikuyta puytinchikllapa. ⁴Chaqa Taytanchik Dyus tukuy imata rurashanqami, kusala allin. Chaynu katinmi tukuy imata rurashantaqa, manami niyta puytinchikchu kayqami mana allinchu nirqa. Ashwanmi tukuy mikuyqaqtaqa, Taytanchik Dyusta payji nir ima mikuyqaq. ⁵Chaqa Tayta Dyus mikunapaq allin nishannulla, mañakur ima mikushamaqa, kusa shumaqchakashana kanqa.

Jesucristupaq yačhachikuqqami kaynu kanqa

⁶Kriyiq masiy Timoteo, nuqa yačhachishushaynu kriyiq masinchikunata allita yačhachirqami kusa allinla

Jesucristupa sirbiqninna kayanki kanqa. Chaymi ashwan qamqa Jesucristupaq mas yaçhakur, maydiyapis kriyishaykinulla kawsarqa, imanutaq allita mikurmaqa imatapis rurayta puytinchik chaynuna yaçhachikuyanki kanqa.

⁷Piru amami kasunkichu chay mana allin kwintukunata yaçhachikuyashanllapataqa. Ashwanmi imanutaq uk pukllaqmaqa chay pukllayashanlapaq kusalata yarpur shachinakun, chaynumi qampis Jesucristulapay yarpur shachinakunki. ⁸Chaqa allita yarpushaqami chay pukllayanchik ima chayqami kwirpunchikpiqa ashllilata yanapamanchik. Piru Jesucristupi kriyirilla pay munashannu kawsashanchikmi kusala mas allinqa. Chaqa paymi armimanchik kay tyimpukuna, chaynulla maydiyapis kusala shumaqtana paywan kawsanallapapay nir. ⁹Chaymi allita intrakayllapa. Chaqa kay nishushayqami kusala chiqap. Chaymi ashwan tukuylla kriyinallapapay kusala allin. ¹⁰Chayraykumi nuqakunamaqa imanutaq mayqanpis trabajarmaqa kusalata qischakan, chaynumi nuqakunapis Taytanchik Dyus munashannula rurar kusalata shachinakunillapa. Chaqa payqami chiqap kawsaq Dyus kar, tukuylla paypi kriyiqkunataqa washamashunllapa.

¹¹Tukuy kay nishushaytami kusa shumaqlata yaçhachikunki, allita intrakananllapapay. ¹²Amami dijakanchichu, qam musullaraq kashaykirayku mana kwintachar disprisyashunanllapataqa. Ashwanmi chay kriyiq masinchikkunataqa tukuy imakunapi allita intrachinki, imanumi uk kriyiqqa kawsanchik nir. Chaynami ashwan chay rimashaykiwan, shumaqta kawsashaykiwan, ukkunata llakipashaykiwan, [shumaqta yarpushaykiwan], imanu kriyirilla kawsashaykiwan, chaynulla tukuy allinlata kawsashaykiwan ima

intrachinki paykunapis qam yupayllana kananllapapay. ¹³Chaynulla, nuqa manaraq watukushuqlapa çhamuyatiyqami, tukuyta naypanpi Dyusninchik nishankunata liyir, kriyiq masinchikkunata yaçhachir ima animachiskinki.

¹⁴Chaymi ashwan kriyiqkunapa rikaqninkuna makinta umaykiman çhurar mañakushanpi yarpurmi karanlata ruranki. Chaqa paykuna chaynu mañakuyatinmi ukninllapata Tayta Dyus intrachitin qampay kaynu niran: “Qamqashi Amitunchikpay karanlata yaçhachikuyanki kanqa” nir.

¹⁵Chayraykumi, tukuylla kay nishushaytaqa karanlata ruray ama qunqar imachu. Chaynu ruratkiquami, waran waranqa kusala masta Dyusninchikpi intrakaqtana rikashunqallapa.

¹⁶Chaynulla qampay allita yarpur amami pantar imachu kusa karanlata yaçhachikunki. Chaynu mana disanimakur ima allita intrakar yaçhachikurqami, mana qam washakanaykilapaychu chaynuqa rurayanki. Ashwanmi tukuylla chay uyakushuqkunapis washakanqallapa.

Imanumi intrachishun kriyiq masinchikkunataqa

5 ¹⁻²Kriyiq masinchikkuna, runa manaqa warmi ruku kaqkuna ima mana allinta tukusha katinpis amami sunsunu anyaqnullaqa willankichu. Ashwanmi taytaykita, mamaykita yupaylla kusa shumaqlata willar intrachinki. Chaynullami chay kriyiq masinchikkuna musu kaqta, shipash kaqkunatapis taytaykimanta, mamaykimanta uknikita yupaylla kusalata rispitar ima shumaqlata willar intrachinki.

Byuda warmikunatami yanapashunllapa

³Chaynulla chay byuda warmisitakunata mana pininpis yanapananpay

katinga, yanapay. ⁴Piru chay byuda warmisitapa wamrankuna, manaqa willkankuna ima kar-shuypaqami paykunana rikar kuytanqa Dyus munashannulla. Chaqa, imanutaq chay wamrakuna taksha katinmaqa taytanllapa yanapar winachiran. Chaymi ashwan kananqa paykunana mamitanllapataqa yanapanqa. Chaynu ruraraqami ayllunta yanapanapaq kaqta kumplir, kusala shumaq allinta rurayan Dyusninchikpa naypanpiqa. ⁵Chaqa uk byuda warmisita payla kashanrayku, mana pinipis yanapananpaq katingami, Taytanchik Dyuslapi kunfyakakur unaq kar, tuta karmapis payman kusalata mañakun mana shaykukuq. ⁶Piru uk byuda warmi kwirpun munashanlata rurar kawsaqqami, Dyusninchikpi mana kunfyakar kawsashanrayku yanqa wanusha yupayllana kawsanmapis. ⁷Chaymi nishayki: Tukuyta kriyiq masinchik-kunatami kay nishushaykunata allita intrachitki rurar kawsanqallapa. Amanaukkuna ukman mana allinta rimananllapapaq. ⁸Chaqa mayqan kriyiqpis ayllunpaq, chaynulla chay wasinllamanta kaq ayllunpaq mana yarpuqqami, Jesucristupi kriyiyashanmatapis mana kwintachayannachu. Chaymi ashwan chay mana kriyiqkunamanmatapis kusala mana allintana tukuyan.

⁹Chaynulla nishaykipis: Kriyiqkunagami yanapayanqa chay byuda warmisitakuna sisintamanta mas añuyjun kaq, apuntakshalata. Chaynulla runanlawan kawsasha kaqta ima. ¹⁰Chaynullami chay yanapakananpaq byuda warmikunataqa kusala allinta rurashanrayku riqsiyta puytinchik. Chaymi ashwan paykunaqa kaynu kanqallapa: Kusala allinta wamrankunata kriyaku-sha, mayqan wasinman chatinpis kusala allinta samachikusha, kriyiqkunata ima

ministishanpi yanapasha, chaynulla tukuy qischakaqkunata yanapasha ima. Chaymi chaynu tukuy allin kaqlata rurasha kaq warmisitakunaqa kusala allin yanapakananpaqqa.

¹¹Piru nishaykipis: Chay warmikuna shipashlla kayar byudana kidatinga, amami apuntankichu chay yanapakananpaq kaq warmisitakunawanqa nir. Chaqa kwirpun munashannulla rurar qashan runakunaraqami, manana Jesucristulapinachu yarpunman. ¹²Chaynu runawan kayta munar runakurqami, Jesucristuta qamlata sirbishayki nir arnishanta mana kumpli-yannachu. Chaynu ruraraqami kusa uchayjunna kayanqa Dyusninchikpa naypanpiqa. ¹³Chaymi ashwan chay warmikunaqa kusala qilla ima tikrakar, wasin wasin ima puriq qallarinnlapa. Piru manami qillalapaqchu tikrakan, ashwanmi kusala kwintastira imana tikrakanllapa. Chaymi kusala mana allin kaqkunaman yakapakar, mana rimaypaq kaq imakunata rimar ima purinnlapa. ¹⁴Chayraykumi nuqataqa kusala allinta yarpuchiman chay shipashlla kaq, byuda warmikunaqa qashan runakunanpaq. Chaynuqami wamrayjun ima kar, wamrankunata wasinllapi kusala shumaqta kriyakutin imaqa, chay kuntramaqinichikkunaqa manana ima mana allintapis nuqanchikkunapaq rimananllapapaqchu. ¹⁵Chaqa kanan rikashanchikllapanumi wakin shipashlla kayar byuda kidaqkunaqa, Jesucristumanta chiqanchakasha chay Satanás munashantana rurayanllapa.

¹⁶Chaymi nishaykipis: Uk kriyiq masinchikpa ayllun byuda kidatinga, chay kriyiqqa paylla yanapanqa ima ministishanpipis. Chaynuqami, kriyiqkunaqa yanapanapaq nir imaqa manana yarpuyanqachu, chay byuda warmisita yanapaqniyun kashanrayku.

Chaymi ashwan, kriyiqkunaqa yanapananpaq chay mana pininpis yanapananpaq kaq chaykunalatana.

**Kriyiqkunaqami rikar
yačhachiqninta kasunqallapa**

¹⁷Nishaykipis: Chay mayqanči kriyiqkunata rikar allita Jesucristupaq intrachir yačhachikuqkunataqami, kusalata rispitar ima masta yanapananpaq kusala allin. ¹⁸Chaqa, Dyus nitin iskribikashakunapimi nin: “Trillakunaykillapapaq qarqami, chay animalpa shimintaqa ama shawankillapachu, ama mikunanpaq” nirqa. Chaynullami ninpis: “Uk trabajaqami pagrakayta puytin” nir.

¹⁹Nishaykipis: Uk kriyiqkunata rikar yačhachiqpaq ima mana allinta tukusha nir mayqan willashutinllapaqa, mañayllapa ishkay, manaqa kimsa tistiguta. Chaynu ruratkillaqa mana chaynu katinqa ama kasuyllapachu chay rimapakuqtaqa. ²⁰Piru mayqan chaynu kriyiqkunata rikar yačhachiq mana allinta rurar uchakuyatinlla-shuypaqa, qayachimur anyaqnulla willayllapa tukuy kriyiqkunapa naypanpi. Chaynuqami wakinkunaqa manchakur amana chaynulla uchakunapachachu.

²¹Piru kanan-shuypaqami Tayta Dyuspa, Jesucristupa, chaynulla Dyus tukuy akrashan kaq angelkunapa naypalanpi nishayki: Karanta tukuy kriyiqkunata yačhachinaykipaq. Kuytawkish qamqa wakinkunata mana allinta rikar, riqsinaykilamatana allinta rikatki nir. ²²Chaynullami nishaykipis: Uk runata Dyusninchikpaq yačhachikunaykipaq nir manaraq allita riqsiyarqa amami makikita ananman čhurarqa mañakunkichu. Chaynuqami nishuni imanupi uchayjun katinmaqa ama qampis uchayjunpaq riqsikanaykipaq. Chaymi ashwan tukuy mana allin

kaqkunamantaqa chiqanchakarna allinlata rurar kawsanki.

²³Nishaykipismi: Shunquyki maydiyalapis nanaq kashanraykumi ama yakuta paylataqa upyankichu. Ashwanmi binupa yakitunta pitilamataqa upyay, amana nanachikunaykipaq nir.

²⁴Allita yačhashanchikllapanu, wakinkuna uchakushanllapataqami das rikayta puytinchikllapa. Piru wakinpa uchanta-shuypaqami mana das rikayta puytinchikllapachu, maydiya Dyusninchik rikarichinankaman. ²⁵Chaynullami, chay allin ruraykunatapis wakintaqa kananlla rikanchik. Nataq wakinkunata-shuypaqa mana rikanchikraqchu. Piru, chay mana rikaypaq chaykunaqa, manami tukuy tyimpupaq pakapllaqa kidanqachu.

**Imanumi uk sirbikuqqa
patrunninwan kanman**

6 ¹Mayqan kriyiq masinchikkuna sirbikuq kaqkunaqa, patruninllapataqa allita rispitar kasunqallapa. Chaynuqami mayqanpis Dyusninchikpaq, chaynulla Amitunchikpaq yačhachikushanchikpaqpis mana ima mana allintapis rimayanqallapachu. ²Piru imanupi uk sirbikuqqa patrunnin, Jesucristupi kriyiq katinmaqa kusa masta rispitar imapipis kasunman kriyiq kashanrayku. Chaymi tukuy imata rurayashanmanmatapis kusala mas shumaqta ruraman. Chaqa tukuy imata rurarpismi rurayan Dyusninchikpi kunfyakar, ukninpaq llakir ima.

Chayraykumi kriyiq masinchikkunata chaynu yačhachir animachiy paykunapis chaynullata rurannllapapaq.

**¿Maypimi chiqap
imanchikkunataqa tariyta
puytinchik?**

³Piru mayqanpis ukmanta yačhachikur Amitunchik Jesucristo yačhachiku-

shanpaq chaynulla nuqanchikkunapis paypi kriyir yaĥachikuyashanchikllapa-paq manami chaynuchu niqkunaqami, ⁴kusala mana yaĥaq yanqa alabakaq runakunala. Chaynu karmi yanqa imakunalapaq kusalata willanakurlla kawsayta munanllapa. Chaymi ashwan chaynu willanakurqa, piñachinakur, musyanakur, anyanakur, inbidyanakur, mana imalapimapis kunfyanakurlamapischu kawsanllapa. ⁵Chaynullami maydiyapis paykunapura kusalata jurapanakur ima kawsanllapa. Chaynu tukuq runakunaqami chay allin kaqmantaqa mana intrakaq runakunachu. Ashwanmi imuraspis chay kusa mana allin kaqlata rurananpaq yarpunllapa. Chaymi ashwan Jesucristupaq yaĥachikurmapis qillayta ganananlapaq yaĥachikunanllapamapis. [Chayraykumi paykunamantaqa chiqanchakanki].

⁶Piru imanchik kaqkunalapaq yarpunamantaqami ashwan Jesucristuta kasur pay munashannula rurur kuntinta-kashallapaqami, Taytanchik Dyusqa kusalata yanapar aligriyachimanchikllapa. ⁷Chaqa allita yaĥashanchikllapanu, manami kusa imayjunchu nasiranchikllapa. Chaynulla maydiya wanurpis manami imatapis apashunllapachu. ⁸Chaymi ashwan imanchiklapis mikunapaq, chaynulla mudakunapaq katinga kusala kuntintu kashunllapa. ⁹Piru chay kusala imayjun kayta munaqkunaqami yanqa imapi liyakasha kanman yupay waran waran kusala mas imayjun kayta munanllapa. Chaynu karmi imanullapis kusala mana allinta tukur, saqra imakunata rurur imami imankunata tarikunanllapa. Piru chaynu tukuyarmi limpu limpu imanarna tukukanllapa. ¹⁰Chaqa allita yaĥashanchikllapanu kusala qillayniyjun ima kanarqami kusala riqchaq mana

allinkunapina rikarir tukukanchikllapa. Chaqa kananllami rikayanchikllapana wakinkunaqa kusala imayjun ima kayta munar, Jesucristupi kriyishanmantaqa chiqanchakar kusala manchaypaq qischakaykunapina rikarishallapa.

**Plabumi willan Timoteuta
kriyishannulla kawsananpaq**

¹¹Piru qam-shuypaqami ukniy Timoteo Dyusuninchikpa chiqap sirbiqnin kanki. Chayraykumi tukuy mana allin kaqmantaqa wakaq tukur, imuraslapis allinlata rurur, Dyusuninchiklata kasur, paylapi kriyir ima wakinnikikunamatapis llakipay ima. Chaymi ima katinpis ama das piñakur imachu shachinakunki. ¹²Chaynulla chay kriyishaykinulla kusalata shachinakurmi tukuy tyimpupaq kawsanaykipaqna yarpunki. Chaqa chaynu tukuy tyimpu kawsachishunanpaqmi Tayta Dyusqa arnishusha. Chaynulla kusala achka runakunapa naypanpimi qamqa nirayki, Tayta Dyuslapi kusalata maydiyapis kunfyakayanki kanqa nir. ¹³Chaymi kananqa, Dyus tukuyta kawsachiqpa, chaynulla Jesucristo, Poncio Pilatupa naypanpi payqashi Dyusuninchikpa Wamran nir rimashapa naypanpi ima nishayki: ¹⁴Tukuy kay willashushaykunata intrakar, ama ukmanta yarpur imachu, karanlata ruray. Chayna, mana mayqanpis qampaqqa ima mana allintapis rimananllapapaqchu. Chaymi chay nishushaytaqa maydiya kusala shumaq Amitunchik Jesucristo tikrakamunankaman ruranki. ¹⁵Chaqa Jesucristuqami shamuyanqa, kusala shumaq Taytanchik Dyus ima tyimpu shamunanpaq nishan tyimpuraq. Chaqa Taytanchik Dyusmi payla tukuy imakunata mantaq chayqa. Chaynulla paymi tukuy mantakuqkunamanta kusala pudirniyjun ima chayqa. ¹⁶Chaqa payqami

tukuy tyimpupaq kawsar mana wanunlamapischu. Chaynulla payqami kusala llipyá intirupi kawsan. Chaymi mana mayqanlapis qimikayta puytinchu. Chaynu katinmi mana mayqanlapis rikashachu. Chaynulla manami rikaymatapis puytinllapachu. ¡Chayraykumi payqa tukuy tyimpupaq kusa alabakashana kanqa kusala pudirniyjún ima kashanrayku! ¡Chaynumi kanqa!

¹⁷Chaynullami nishayki: Chay kusala imayjún ima kaqkunata willay ama kusana kani ima nir chay imankunalapi kunfyakananllapapaqnachu. Chaqa tukuy kay pachapi kaq imançhikkunagami daskaqla tukukan. Chayraykumi ashwan Taytanchik Dyuslapi allita kunfyakashunllapa. Chaqa paymi tukuy ima ministishanchikkunapiqa kusalata yanapar aligriyachimashunllapa. ¹⁸Chaynami paykunataqa willaypis: Kusala allin kaq imakunata rurarna kusala imayjún yupayna tikrakananllapapaq. Chaynullami yarpuchinkipis tukuy iman kaqkunawanpis ukkunata

yanapananllapapaq nir. ¹⁹Chaynu rurarllapagami Dyusninchikmantata tukuy tyimpupaq chiqap kaq imanllapata tarikunqallapa. Chaymi ashwan chiqaptana Dyusninchikwan maydiyapis kawsanqallapa.

**Pablumi tukukananta
Timoteuta willan**

²⁰Uknuy Timoteo, Taytanchik Dyus imakunata ruranaykipaq nishushantagami kusa allita ruranki. Chaymi chay mana kriyiqkuna mana sirbiq yanqa imakunata yaçhachikun chaykunataqa ama kasunkichu. Chaqa paykunagami Jesucristuta kuntrar kusala mana allinta ima rimanllapa. Piru chaynu nirmapismi Jesucristupaq kusalata intrakaq yupay tukur yaçhachikunllapa. ²¹Chaymi ashwan wakin runakunaqa paykunatana kasur, Dyusninchikpiqa manana kriyinllapanachu.

Chaymi Amitunchik Jesucristuman mañakuni kusalata llakipar yanapashunanllapapaq.

Chaynumi kanqa.